



REPUBLIKA E SHQIPËRISË  
AVOKATI I POPULLIT

Mekanizmi Kombëtar për Parandalimin e Torturës,  
trajtimit ose dënimit të egër, çnjerëzor ose poshtëruës

Adresa: Bulevardi: "Zhan D'Ark" Nr.2  
Tiranë, Shqipëri

Tel/Fax: +355 4 2380 300/315  
E-mail: [ap@avokatipopullit.gov.al](mailto:ap@avokatipopullit.gov.al)  
[www.avokatipopullit.gov.al](http://www.avokatipopullit.gov.al)

Nr. Prot. Tiranë \_\_\_/\_\_\_/2019  
Nr. Dok. 201802062/2

**Lënda:** Rekomandime për inspektimin e kryer në Komisarlatin e Policisë Vlorë.

**Drejtuar:** Z. Alket AHMETI  
Shef i Komisarlatin të Policisë Vlorë

**VLORE**

**Për dijani:** Drejtues Madhor Ardi VELIU  
Drejtor i Përgjithshëm i Policisë të Shtetit

**TIRANË**

Drejtuesi i Parë Gentian SHEHAJ  
Drejtor i Drejtorisë Vendore të Policisë Vlorë

**VLORE**

*Të nderuar zotërinj,*

Avokati i Popullit, në rolin e Mekanizmit Kombëtar për parandalimin e torturës, trajtimit ose dënimit të egër, çnjerëzor ose poshtëruës, në vijim Mekanizmi Kombëtar,<sup>1</sup> bazuar në nenin 19/1 të ligjit nr. 8454, datë 04.02.1999, "Për Avokatin e Popullit", i ndryshuar, kreu një inspektim në Komisarlatin e Policisë Vlorë.

Inspektimi u krye në datën 16.09.2018, sipas Planit të Inspektimit të miratuar nga Avokati i Popullit. Në përbërje të grupit inspektues mori pjesë znj. Ermonela Xhafa, Komisionere e Mekanizmit Kombëtar, Besnik Deda, Alfred Koçobashi dhe Genci Tërpo me detyrë Nd/Komisionerë pranë Mekanizmit Kombëtar.

Inspektimi kishte si qëllim verifikimin e respektimit të standarteve të përcaktuara në ligjin nr. 108/2014, "Për Policinë e Shtetit", Urdhrin e Drejtorit të Përgjithshëm të Policisë së Shtetit nr. 1102, datë 07.11.2017, për miratimin e procedurës standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", Urdhrin e Drejtorit të Përgjithshëm të Policisë së Shtetit nr. 306, datë 31.03.2016, për miratimin e procedurës standarde "Rregullat teknike të shoqërimit në polici", si dhe zbatimin e rekomandimeve të Avokatit të Popullit të bëra gjatë inspektimeve të mëparshme.

<sup>1</sup> Neni 74/1 i ligjit nr. 8328, datë 16.04.1998, "Për të drejtat dhe trajtimin e të dënuarve me burgim dhe të paraburgosurve", i ndryshuar.

Institucioni i Avokatit të Popullit, pasi u njoh me konstatimet e grupit inspektues ka detyrimin kushtetues dhe ligjor t'ju parashtrijë konkluzionet përfundimtare, duke ju referuar si më poshtë vijon:

### **Shënime paraprake**

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi i inspektimit u takua me z. Gentian Shehaj, Drejtor i Drejtorisë Vendore të Policisë Vlorë dhe shefin e Seksionit të Rendit në Komisaratin e Policisë Vlorë, të cilët u vunë në dijeni lidhur me qëllimin e inspektimit.

Shefi i seksionit të rendit në Komisaratin e Policisë Vlorë, informoi për gjendjen e ambientit të shoqërimit dhe të sigurisë, në përputhje me standardet ligjore, si dhe mbi masat e marra për zbatimin e rekomandimeve të lëna nga Avokati i Popullit nga inspektimi i mëparshëm në lidhje me përmirësimin e kushteve dhe standardeve në ambientet e shoqërimit dhe ato të sigurisë në këtë komisariat.

Grupi inspektues, vijoi takimin me punonjësit e policisë të zyrës së informacionit dhe të shërbimit në dhomat e sigurisë, inspektoi ambientet e shoqërimit dhe ato të sigurisë, disa nga zyrat e punonjësve të policisë, si dhe u njoh me gjithë dokumentacionin përkatës ku pasqyroheshin veprimet e kryera me personat e shoqëruar dhe të ndaluar/arrestuar. Theksojmë se, drejtuesi i komisarimit dhe punonjësit e policisë u treguan bashkëpunues dhe transparentë gjatë komunikimit dhe inspektimit në ambientet e këtij komisarati.

Sipas informacionit dhe nga inspektimi i kryer, rezultoi se gjendja e kushteve dhe standardeve në ambientin e shoqërimit dhe të sigurisë ishte e njëjtë nga inspektimi i mëparshëm. Institucioni i Avokatit të Popullit në vite ka konstatuar në Komisaratin e Policisë Vlorë të njëjtën problematikë dhe ka rekomanduar për marrjen e masave për ndërtimin dhe përshtatjen e këtyre ambienteve, në përputhje me standardet e parashikuara në aktet normative dhe dokumentat ndërkombëtare, por situata vazhdon të jetë e njëjtë. Më problematike ishte gjendja e infrastrukturës në ambientin e sigurisë në Komisaratin e Policisë Vlorë, për shkak se në këtë komisariat, sillen dhe trajtohen edhe personat e arrestuar/ndaluar nga komisaritet e policisë Sarandë dhe Delvinë.

Plotësimi i kushteve dhe standardeve për mbajtjen dhe trajtimin e personave të shoqëruar dhe të arrestuar/ndaluar në mjediset e policisë, përbën detyrim ligjor për Komisaratin e Policisë Vlorë, por në veçanti për Drejtorinë Vendore të Policisë Vlorë, për kryerjen e investimeve në këto ambiente në përputhje me kapacitetin e qarkut, si dhe për garantimin e respektimit të të drejtave të personave të privuar nga liria.

Konkretisht, nga kryerja e inspektimit u konstatua se, nuk ishin zbatuar rekomandimet e Institucionit të Avokatit të Popullit nga inspektimi i mëparshëm, që lidhen me:

- ndërtimin e dhomave të shoqërimit dhe të sigurisë, të ndara më vete për personat e rritur, femra dhe të mitur, sipas standardeve ligjore dhe akteve ndërkombëtare;
- krijimin e dhomës (zyrës) ku merren në pyetje personat e ndaluar/arrestuar para se të dërgohen në ambientet e sigurisë, si dhe,
- mungonte instalimi i sistemit të monitorimit audio dhe/video për vëzhgimin e ambienteve në korridorin e dhomave të shoqërimit, dhomave të sigurisë, si dhe në dhomën për marrjen në pyetje/intervistimin e personave të privuar nga liria.

Ndërkohë u konstatua se, ishte zbatuar rekomandimi për plotësimin me përgjegjësi e saktësi të rubrikave të regjistrit të shoqërimit dhe regjistrit për evidentimin e personave të arrestuar/ndaluar.

Në përfundim të inspektimit grupi i inspektimit konstatoi se në Komisarlatin e Policisë Vlorë vazhdonin të përsëriteshin problematikat, si më poshtë:

### **Ambientet e shoqërimit dhe kushtet e tyre**

Në Komisarlatin e Policisë Vlorë ambienti shoqërimi nuk ishte ndërtuar sipas kërkesave të parashikuara në procedurën standarde “Rregullat teknike të shoqërimit në polici”, miratuar me Urdhrin e Drejtorit të Përgjithshëm të Policisë së Shtetit nr.306, datë 31.03.2016. Referuar kushteve dhe kritereve të përcaktuara në aktin e mësipërm, dhomat e shoqërimit duhet të kenë sipërfaqe dhe hapësira të bollshme për qëndrimin e personave të shoqëruar, si dhe të jenë të ndara më vete për persona e rritur, femra dhe të miturit.<sup>2</sup> Pavarësisht disa ndërhyrjeve në drejtim të përmirësimit të kushteve fizike, gjëndja e ambientit të shoqërimit në Komisarlatin e Policisë Vlorë nuk është në përputhje me standardet e kërkuara.

Në Komisarlatin e Policisë Vlorë ishte vetëm 1 (një) dhomë shoqërimi e ndarë me dy ambiente. Kjo dhomë shërbente vetëm për shoqërimin e personave të rritur. Në rastet kur shoqëroheshin femra dhe të mitur, ata mbaheshin në zyrat e punonjësve të policisë deri në përfundim të verifikimit të rastit apo kryerjes së veprimeve proceduriale për të cilat ishin shoqëruar në organin e policisë.

Dhoma ishte e lyster, e pastër, si dhe e pajisur me tavolinë dhe karrige të palëvizshme të fiksuara në dysheme. Ajo kishte një dritare e cila mundësonte ajrim dhe ndriçim të plotë natyral, si dhe kishte ndriçim artificial nga rrjeti elektrik. Në këtë ambient, mungonte tualeti i veçantë për personat e shoqëruar dhe si i tillë shërbente tualeti që përdorej nga personeli i këtij komisarlati. Në dhomë dallohej lagështia në mure dhe ndihej erë myku.

Gjithashtu, në ambientin e shoqërimit mungonte sistemi i monitorimit me kamera, i cili shërben për mbajtjen në vëzhgim të korridorit të dhomave të shoqërimit.

Grupi i inspektimit konstatoi se, mungonin dhomat e shoqërimit të ndara më vete për femra dhe të mitur, si dhe dhoma për marrjen në pyetje/intervistimin e personave të shoqëruar nga punonjësit e policisë gjyqësore.

Mungesa e këtyre elementëve, mund të përbëjë shkak për përdorimin e mjeteve dhe metodave jo të përshtatshme për shoqërimin, mbajtjen dhe trajtimin e personave në mjediset e policisë, si dhe për respektimin dhe garantimin e të drejtave që ju njeh ligji këtyre personave.

### **Ambientet e sigurisë dhe kushtet e tyre**

Në Komisarlatin e Policisë Vlorë ambienti i sigurisë nuk ishte konform normave, kushteve dhe standardeve për mbajtjen, trajtimin dhe sigurimin e personave të arrestuar/ndaluar, sikurse përcaktohet në procedurën standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e

---

<sup>2</sup> Kreu VI, pika 3/b e procedurës standarde: “Rregullat teknike të shoqërimit në polici”

kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.1102, datë 07.11. 2017.

Grupi i inspektimit konstatoi se, gjendja e dhomave në ambientin e sigurisë lidhur me plotësimin e kushteve fizike sipas standardeve, nuk kishte ndryshuar nga inspektimi i mëparshëm.

Në këtë ambient, ndodheshin 4 dhoma sigurie, 2(dy) për persona të rritur, 1 (një) për femra dhe 1 (një) për të mitur. Kapaciteti i dhomave ishte për 7 persona, por sipërfaqja dhe hapësira e dhomave nuk ishte e mjaftueshme për të përballuar këtë kapacitet.

Sipas kriterëve për ndërtimin e dhomave të sigurisë<sup>3</sup>, normat dhe parametrat teknike, jetësore e të sigurisë për një person të arrestuar/ndaluar janë që sipërfaqja e përgjithshme e ambientit duhet të jetë jo më pak se 10 m<sup>2</sup>, e cila duhet të ndahet në ambient qëndrimi me sipërfaqe 6 m<sup>2</sup> dhe paradhomë me sipërfaqe 4 m<sup>2</sup>. Lartësia e këtyre ambienteve duhet të jetë jo më pak se 2.5 m., Referuar këtyre elementëve, dhomat në ambientin e sigurisë në Komisaratin e Policisë Vlorë nuk plotësojnë asnjë nga këto kriterë.

Ndërkohë, në bazë të urdhërit të Drejtorit të Përgjithshëm të Policisë së Shtetit, dhomat e sigurisë në Komisaratin e Policisë Vlorë, duhet të kenë kapacitete fizike të tilla të përballojnë jo vetëm nevojat e tyre, por dhe mbajtjen, trajtimin dhe sigurimin e personave të arrestuar/ndaluar nga organet e policisë të Sarandës dhe Delvinës.

Dritaret e dhomave ishin me përmasa të vogla dhe nuk lejonin ajrim dhe ndriçim natyral të mjaftueshëm. Në këtë ambient kishte ndriçim artificial që sigurohej nga rrjeti elektrik. Të katërta dhomat ishin të lyera, të pastra, të pajisura me orënditë e nevojshme si krevatë, dyshekë, jastëk dhe batanije. Në ambientin e sigurisë kishte tre tualete nga të cilat dy ishin brenda dhomave dhe një në korridor. Në tualete mungonte dushi me ujë të ngrohtë. Sistemi i ngrohjes dhe ftohjes në dhoma mungonte. Në dhomat e sigurisë mungonte dhe ambienti i veçantë për ajrimin e të arrestuarve/ndaluarve.

Në ambientin e sigurisë kishte një dhomë, e cila përdorej nga mjeku për kryerjen e vizitave mjekësore dhe e pajisur me orënditë e nevojshme si shtrat, tavolinë, karrige, rafte dhe pajisje për ngrohje. Njëkohësisht, sipas informacionit të punonjësit të policisë të shërbimit në ambientin e sigurisë, kjo dhomë përdorej edhe nga prokurorët për marrjen në pyetje të ndaluarve/arrestuarve, si dhe për takime me avokatët.

Në korridorin e ambientit të sigurisë ishte instaluar një telefon fiks, i cili shërbente në rastet emergjente për njoftimin e zyrës së informacionit nga punonjësit e policisë që shërbenin në këtë ambient. Në dhomat e sigurisë mungonte butoni me zile/sinjali në mur për kontaktin e personave të arrestuar/ndaluar me punonjës të policisë në rast nevojë.

Në ambientin e sigurisë të Komisaratis të Policisë Vlorë, mbetet si problem mungesa e instalimit të sistemit audio-vizive, për vëzhgimin e korridorit dhe të dhomës që përdoret për intervistimin/marrjen në pyetje të personave të arrestuar/ndaluar.

Ambienti i sigurisë kishte gjeneratorë më vete, si burim rezervë të energjisë në rast të ndërprerjes së energjisë elektrike.

---

<sup>3</sup> *Kreu VIII, pika 3 e procedurës standarte “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”.*

## **Regjistri i personave të shoqëruar, ndaluar/arrestuar dhe evidentimi i tyre**

Gjatë inspektimit u konstatua se, në Komisarlatin e Policisë Vlorë, “Regjistri i evidentimit të të dhënave për personat e shoqëruar” ishte sipas tipit “Model nr.1” të procedurës standarde “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit dhe ishte i sekretuar.

Të gjithë personat e shoqëruar, sipas dispozitave të parashikuara në ligjin nr. 108/2014 “Për Policinë e Shtetit”, regjistroheshin në regjistër nga punonjësit e zyrave të informacionit. Nga këqyrja e këtij dokumenti rezultoi se, regjistri ishte plotësuar sipas rubrikave dhe ishte i sekretuar. Koha e qëndrimit të shtetasve në gjendje shoqërimi ishte e ndryshme nga 1 deri në 10 orë në raste të veçanta.

Ndërsa të ndaluarit/arrestuarit nga punonjësit e policisë të këtij komisarati evidentoheshin në regjistrin e personave të ndaluar/arrestuar, i cili ishte i sekretuar. Ky regjistër ishte i plotësuar me korrektësi në të gjitha rubrikat e tij.

Nga verifikimi i rregjistrave ku evidentohen rastet e shoqërimit dhe të arrestimeve/ndalimeve të kryera nga punonjësit e komisarimit të policisë, konstatuam se, punonjësi i policisë shënonte në procesverbalet e arrestimit apo ndalimit orën faktike kur personi shoqërohet për në organin e policisë, pra në orën kur personit i është privuar liria dhe jo orën kur përpilohet procesverbali përkatës. Sa më sipër, evidentuam zbatimin e rekomandimit të Avokatit të Popullit për ndryshimin e praktikës lidhur me orën e arrestimit dhe ndalimit të shtetasve.

### **Trajtimi i të ndaluarve/arrestuarve dhe i të shoqëruarve në ambientet e policisë.**

Në kohën e inspektimit në ambientet e shoqërimit në Komisarlatin e Policisë Vlorë, nuk kishte asnjë person të shoqëruar. Ndërsa në ambientin e sigurisë ishin 2 persona, nga të cilët 1(një) i arrestuar dhe 1 (një) i ndaluar, në dhoma më vete.

Nga inspektimi u konstatua se, sipërfaqja dhe kubatura e dhomave të sigurisë<sup>4</sup> nuk ishin të mjaftueshme për të përballuar kapacitetin për 7 (shtatë) persona. Nga informacioni i punonjësve të shërbimit në dhomat e sigurisë, u konstatua se në rast mbipopullimi në të dy dhomat e planifikuara për personat e rriturit, personi tjetër detyrohej të flinte në dyshekë të vendosur mbi dysheme, pasi nuk kishte shtretër. Dhomat e sigurisë në Komisarlatin e Policisë Vlorë, janë miratuar nga Drejtori i Përgjithshëm i Policisë të Shtetit për mbajtjen, trajtimin dhe sigurimin e personave të arrestuar/ndaluar nga punonjësit e policisë të këtij komisarati, por dhe nga organet e policisë në varësi të Drejtorisë Vendore të Policisë Vlorë.

Grupi i monitorimit intervistoi personat e ndaluar/arrestuar, të cilët konfirmuan se ishin trajtuar në mënyrë korrekte gjatë kohës së marrjes në pyetje nga oficerët e policisë gjyqësore dhe qëndrimit në ambientin e sigurisë. Nga të intervistuarit nuk pati pretendime për trajtim denigrues, jo human apo për ushtrim dhune fizike e psikologjike. Gjendja psikologjike e të intervistuarve ishte e qetë dhe nuk dëshmonte për pasojë të shkaktuara

---

<sup>4</sup> *Kreu VIII, pika 3 e procedurës standarte “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”.*

nga keqtrajtimi. Të intervistuarit nuk dëshmuar frikë apo ekspozim për të raportuar nëse kishin keqtrajtim.

Ata shpjeguan se, gjatë ndalimit/arrestimit punonjësit e policisë ishin identifikuar përpara tyre duke u prezantuar me gjeneralitetet dhe detyrën që kryenin. Koha e qëndrimit të arrestuarve në ambientin e sigurisë ishte brenda afatit ligjor. Nga intervistimi i punonjësve të informacionit, rezultoi se, gjatë këtij viti nuk kishte raste të vonesave për transferimin e personave të arrestuar/ndaluar në Institucionet e Ekzekutimit të Vendimeve Penale, për shkak të ekzekutimit të vendimeve të dënimit të tyre penal.

Gjithashtu, nga informacioni i dhënë nga punonjësit e policisë që shërbenin në dhomat e sigurisë dhe pyetja e personave të ndaluar/arrestuar rezultoi se, të arrestuarit/të ndaluarit trajtoheshin me ushqim tre herë në ditë sipas normave për trajtimin me ushqim të përcaktuar në urdhrin e përbashkët nr. 432, datë 10.03.2008 të Ministrit të Brendshëm dhe Ministrit të Shëndetësisë.

Në ambientet e sigurisë nuk kishte ambient kulti, por të arrestuarve/të ndaluarve u lejohej ushtrimi i riteve fetare brenda dhomave të sigurisë.

Të arrestuarit/të ndaluarit pajiseshin me produkte për ruajtjen e higjenes vetjake dhe të ambientit, si sapun, detergjente, letra higjienike dhe letra për fshirjen e duarve dhe të fytyrës.

### **Ambientet e intervistimit**

Nga informacioni i dhënë nga drejtuesit e policisë në Komisarriatin e Policisë Vlorë, si dhe nga verifikimi në vend i ambientit të shoqërimit dhe të sigurisë, rezultoj se pranë tyre nuk kishte asnjë zyrë intervistimi për marrjen në pyetje të shtetasve nga punonjësit e policies, e cila të ishte e monitoruar me kamera. Shtetasit e ndaluar/arrestuar, para se të ndaloheshin apo të arrestoheshin, intervistoheshin nga oficerët e policisë gjyqësore në zyrat e punës së këtyre të fundit.

Referuar standardeve ndërkombëtare<sup>5</sup>, Avokati i Popullit e konsideron procesin e monitorimit filmik një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e policisë së shtetit ndaj tyre.

Nga inspektimi që u bë në disa prej zyrave të oficerëve të policisë gjyqësore që u ndodhën prezent në kohën e inspektimit, nuk u gjetën pajisje prania e të cilave ekspozon dhunë tek personat me të cilët ata kryenin veprime procedurale.

Në përfundim të vizitës, grupi i inspektimit administroi praktikat shkresore në lidhje me nevojat dhe kërkesat e Komisarriatit të Policisë Vlorë, për zbatimin e rekomandimeve të Institucionit të Avokatit të Popullit nga inspektimi i mëparshëm. Në informacionin e

---

<sup>5</sup> “Një sistem i monitorimit të vazhdueshëm i standardeve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të rregjistrohen në mënyrë sistematike koha kur ka filluar dhe mbaruar intervista, ndonjë kërkësë të bërë nga i ndaluari gjatë intervistës, si dhe të personave të pranishëm gjatë çdo interviste.” CPT’ reports; Armenia: Visit 2010[par.18]

Komisariatit të Policisë Vlorë<sup>6</sup> rezultoi të ishin parashikuar masa për zbatimin e rekomandimeve të Avokatit të Popullit dhe në vijim ishte ngritur grupi i punës<sup>7</sup> për studimin, vlerësimin dhe hartimin e detyrave të projektimit për rikonstruksionin e godinave në administrimin e saj, në veçanti për ndërtimin e ambineteve të reja të shoqërimit dhe të sigurisë, në përputhje me procedurat standarte të miratuara nga Drejtori i Përgjithshëm i Policisë së Shtetit.

Nga informacioni i Drejtorit të Drejtorisë Vendore të Policisë Vlorë dhe drejtuesit të Komisarariatit të Policisë Vlorë, konstatoam se projekti është dërguar në Drejtorinë Ekonomike pranë Drejtorisë të Përgjithshme të Policisë dhe fondet për këto investime, janë përfshirë në projektet prioritare që do të miratohen në buxhetin e vitit 2019.

### **Ndihma juridike, psikologjike dhe kujdesi mjekësor**

Gjatë inspektimit u konstatua se në korridoret në ambientin e shoqërimit dhe të sigurisë të Komisarariatit të Policisë Vlorë ishin të afishuara posterat me të drejtat e personave të ndaluar/arrestuar, si dhe atyre të shoqëruar, të cilat është e nevojshme të rinovohen me postera të rinj.

Sipas punonjësve të policisë, të ndaluarit/arrestuarit dhe të shoqëruarit njiheshin me të drejtën për të pasur një avokat mbrojtës gjatë marrjes në pyetje, dhe ata që e kishin kërkuar iu ishte krijuar mundësia për të kontaktuar me të. Nga pyetja e punonjësve të policisë rezultoi se në rastet kur të ndaluarit/arrestuarit madhorë të cilët nuk kishin mundësi financiare për të pajtuar avokat privat dhe kërkonin ndihmë juridike, atyre iu sigurohej mbrojtja me avokat kryesisht të caktuar nga prokurori sipas dispozitave të Kodit të Procedurës Penale. Ndërsa në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht, ose të zgjedhur nga familjarët e tyre, si dhe të psikologut.

Informacioni i dhënë nga punonjësit e policisë u konfirmua edhe nga pyetja e 2 (dy) të arrestuarve/ndaluarve, të cilët deklaruan se ishin njohur me të drejtat ligjore nga punonjësit e policisë kur ishin marrë në pyetje dhe ishin takuar me avokatët e tyre.

Personave të ndaluar/arrestuarve iu ishin dhënë nga oficerët e policisë gjyqësore kopje të procesverbalit të ndalimit/arrestimit, të kontrollit personal dhe formularit me të drejtat e tyre. Po ashtu, punonjësit e policisë në zyrën e informacionit, dispononin formularët me të drejtat e personave që ju privohet liria në këto ambiente të përkthyer në 7 gjuhë të huaja.

Të arrestuarve/ndaluarve u ishte bërë vizita mjekësore brenda afatit 12 orë nga mjeku i Drejtorisë Vendore të Policisë Vlorë,<sup>8</sup> i cili ishte i punësuar në këtë organ me kohë të plotë. Vizitat mjekësore, rekomandimet dhe mjekimet regjistroheshin në regjistrin e vizitave mjekësore që mbahej nga përgjegjësi i ambientit të sigurisë së këtij komisaritati.

<sup>6</sup> Shkresë nr.351/2, datë 27.02.2018 drejtuar Drejtorit të Drejtorisë Vendore të Policisë Vlorë dhe Departamentit të Sigurisë Publike pranë Drejtorisë të Përgjithshme të Policisë

<sup>7</sup> Urdhër nr.544 prot., datë 06.03.2018 i Drejtorit të Drejtorisë Vendore të Policisë Vlorë

<sup>8</sup> Kreu V, pika 7/2 e procedurave standarde: "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", miratuar me Urdhrin e Drejtorit të Përgjithshëm të Policisë së Shtetit nr 1102, dt. 07.11. 2017.

Në ambientet e shoqërimit dhe të sigurisë të këtij komisariati është i afishuar numri i kontaktit falas me zyrën e Avokatit të Popullit.

Gjithashtu në këtë komisarjat ishte hapur regjistri i kërkesë/ankesave të personave të arrestuar/ndaluar, por në të nuk ishte evidentuar asnjë kërkesë apo ankesë.

Në këtë komisarjat zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse.

Për sa më sipër, bazuar në pikën 3 të nenit 63 të Kushtetutës ku parashikohet se: “Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike” dhe në bazë të nenit 21/b të ligjit nr. 8454 dt.04.02.1999 “Për Avokatin e Popullit”, i ndryshuar, ku përcaktohet se: “Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”, me qëllim zgjidhjen e problemeve të konstatuara gjatë këtij inspektimi,

### **REKOMANDOJMË :**

1. Marrjen e masave të nevojshme për ndërtimin e ambienteve të reja të sigurisë sipas procedurave standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.1102, datë 07.11. 2017.
2. Marrjen e masave të menjëhershme për ndërtimin e ambienteve të shoqërimit sipas kriteve të parashikuara në procedurat standarde: “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit, duke krijuar ambiente të përshtatshme, dinjitoze, të pajisura me orëditë e nevojshme për qëndrim, të ndara më vete për femra, meshkuj dhe të mitur.
3. Marrjen e masave të nevojshme për krijimin në ambientet e shoqërimit dhe të sigurisë të dhomës më vete për marrjen në pyetje/intervistimin e personave të shoqëruar dhe të ndaluar/arrestuar në mjediset e komisarjatis.
4. Marrjen e masave të nevojshme për vendosjen e pajisjeve të sigurisë (sisteme me kamera audio-vizive) për monitorimin e ambienteve të brëndshme dhe të jashtme të dhomave të shoqërimit dhe të sigurisë, si dhe veprimet e punonjësve të policisë me personat që ndodhen në mjediset e policisë.
5. Marrjen e masave të nevojshme për rinovimin e materialeve informuese (postera) për njohjen e personave të shoqëruar dhe personave të arrestuar/ të ndaluar në mjediset e policisë, me të drejtat e këtyre personave.
6. Marrjen e masave të menjëhershme për instalimin në dhomat e sigurisë të butonit me zile/sinjali në mur, për kontaktin e personave të arrestuar/ndaluar me punonjës të policisë në rast nevojë.



7. Marrjen e masave të menjëhershme për ndërtimin në ambientin e dhomave të sigurisë të një ambienti të posaçëm, që të shërbejnë për larjen e trupit të arrestuarve/ndaluarve dhe sigurimin e ujit të ngrohtë.
8. Marrjen e masave të menjëhershme për sigurimin e ngrohjes në ambientin e dhomave të sigurisë me sistem ngrohje qendrore.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit nr. 8454, datë 04.02.1999 “Për Avokatin e Popullit”, i ndryshuar.

*Duke besuar në mirëkuptimin dhe bashkëpunimin tuaj.*

**KOMISIONER**

**Ermonela XHAFJA**